

तुबारि संपादकीय
टीम

◆अस इ उम्मिद करुं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिस्ट्रि नेई भो। सिर्फ पांगि घाटि अन्तर पहुँ जे इ पत्रिका शुरु कियो सि।

◆तुबारि एक अवाणिज्यिक पत्रिका भो।

◆तुबारि पत्रिका कोइ मेहणु, जनजाति, त संस्कृति गल्लि कहेण जे नेई छपाण लगे। अगर कोइ ई सोचता बि त अस जिम्मेवार नेई।

◆छपाणे पेहले सोभ आर्टिकल दुई टाई पागेई मेहणु हुरालो असे। इ त खुलि बोक असि कि पेहिल बार पांगवाडि लिखणे सुआ मुशकिल भुल्लि त गलति बि भुल्लि। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल ना मिले, या घाटि मेहणु के मदद ना मिले त तुबारि पत्रिका कदि बि बंद भुई सकति।

◆कोइ चिज छपां सि या नेई छपां जे तुबारि संपादकीय टीमे पुरा अधिकार असा।

◆अस किलाड केन्द्रीय पुस्तकालय, त बजार राखे ठेके भेड हरिरामे दुकान अन्तर तुबारि ट्राप बाँस पुठ बि अपुं सझाव ओर अर्टिकलस रखुं जे सुविधा कियो असि।

◆अस सोभि पांगि मेहणु जे हात जोड़ कई निवेदन कते कि, तुस बि कोइ अच्छा अर्टिकल, पुराणि या नौई कथा, कहावत, कविता, त नौवे घीत (पांगवाडी अन्तर) लिख कई छपां जे हेँनदे दिए।

तुबारि संपादकीय टीम

9418431531
9418429574
9418329200
9418411199
9418411599



अलग-अलग असे, पर खरे असे!

कथा: मुकेश अपु कम केआं थकी कइ गी ओ थिआ। रीता बी अपु कम केआं ओ थी। रीता बी थको असी, पर तसे मुंह नेइ थको। रीता अपु धणि जोड़ कमे बारे, अपु राणे-रणी बारे, त ओत-कोती बड़ सोभि के बारे बोक करण शुरु कइ छेई। से बोक कती रेही, बोक कती रेही, बोक कती रेही... 10 मन्टे बाद मुकेश एक जबाव दिता त चुप भोइ गा। रीता अपु हथ-खुर हिलाइ-हिलाइ कइ त कपले लेहरि कइ त कपले हंसी-हंसी कइ लगातार बोक कती रेही। दुवारी 5-6 मन्टे बाद मुकेश फिर एक जबाव दिता त चुप भोइ गा। पता रीता मुकेश जे लहेरी कइ गया देण लगी। 'अउं अत बोक करण लगे असी, त तु किस घोड़ बण कइ बिशो असा? तु बोक किस ना कता?'

इ ड्रामे तुसी अपु गी या होरी गी काओ असे ना? अ आम भो ना? एक खोज अन्तर पता लग गो असा कि, जिल्हाणु एक रोज 25000 केंआ जादा शब्द बोती। पर मइद 10,000 केंआ घट शब्द बोते। मइद ई सोचुण बी मुशकिल असु कि में जुएली अति बोक कीं कति रेहंती। पर होर कना, मइद अगर किछ कम भोल त तउं बोक कता। जिल्हाणु के ई बोकि ना बिश्ते। मइद किछ कमे बारे, किछ समस्या बारे, किछ खास दिलचस्पी राजनीति, क्रिकेटे, खबरे बारे..... बोक कते। किछ खोज बतांते, मइदे दिमाक जिल्हाणु दिमाक केंआ अलग चलता। जिल्हाणु दिमाक अन्तर उमल त सुमल कना जे सुआ जोड़ असे, पर मइदे यके कना जे सुआ जोड़ असे। ईश्वरे मइद त जिल्हाणु एक समान बणाए पर अलग-अलग। अस ई ना समझते त छोटी बोड़ी लड़ाई-झगड़े भुन्ते रेहंते। जिल्हाणो, तुसी अन्तर सुआ बोक करणे ताकत असी, अ ताकत खारे कम जे लाण त होरी के बुराई करण जे ना लाण। 'अकलदार जिल्हाणु अपु घर बड़ाती, पर बेअकली जिल्हाणु अपने हते बड़ अपु गी टाई छती'।

आलू पराँठा: रवि त सुनीता दुहे के नउआ-नउआ ब्याह भो थिआ। दुइ हफते बाद सोब रिश्तेदार घेइ गे। रवि त सुनीता बी नौखरी करण जे अपु क्वाटर घेइ गे। एक रोज सुनीता नुहारी जे आलूण पराँठा बणा। रवि अपु जुएली धे हेरी बिशा त में जुएली की अब्बुल असी, तरीफ करण लगे थिआ। दुहे जेइ साते बिश कइ नुहारी करण लग गे। त रवि ईहाणि अपु जुएली जे बोलु, 'तेइ नुहारी त अब्बुल बणाई पर में ईये हते आलूण पराँठी जादा स्वाद भुन्ता। में ई किछ बी रोठि बणाल से अब्बुल भुन्ती'। इ बोल कइ झठ अपु ऑफीस जे घेइ गा। नुहारी बारे तेन अपु जुएली जे की बोलु, ऑफीस घेण केंआ पहले ई से सोब बिश्री गो थिआ।

ऑफीस घेइ कइ तसे पूरा ध्यान अपु कम पुठ लग गा। मीटींग अन्तर सुआ योजना बणाई, अपु कम्पनी सुआ अधूरे कम पूरे किए। मनेजरे रवि कमे सुआ तरीफ की। होर कना, गी तसे जुएली साफ-सफाई की त अपु स्कूल जे तियार भोइ गई। (से एक स्कूल मास्टराणी लगे थी)। पर से घड़ी-घड़ी अपु धणि बोकी बारे सोचण लगे थी, 'में आलूण पराँठा असे ईया केंआ अब्बुल नेइ'। स्कूल घेइ कइ अपु सुआ सहेली जोड़ मिई, हसी-हसी बोक की, अपु ब्याहे फोटो हरली, क्लास घेइ कइ गभुर सुसर पढा, अपु सहेली जोड़ प्रिंसिपले बारे, होर अपु ब्याहे बारे सुआ बोक की। पर फिर बी से घड़ी-घड़ी अपु धणि बोकी बारे सोचती रेही, 'में आलूण पराँठा अस अब्बुल ना लगा'। से सोचण लगे थी कि अउं असे ईये ई कदि रोठि ना बढ़ाई बठती। में रोठि में धणि पसंद ना ऐइएल तउं से रोज बहरीया रोठि खाइ ऐन्ता; ऑफीस अन्तर कोउं जिल्हाणु अब्बुल रोठि बणाई कइ आपती त तन्के गी घेण शुरु भोइ घेन्तू। सुनीता मन अन्तर इ भोइ गो कि, 'अउं एक अब्बुल जुएली ना बण सकती'। ब्यादी स्कूला गी आई त रोठि बणा लगी, अपु ईया-बोउ, सहेली जे फोन किया। पर तेस टेम बी से अपु धणि बोकी बारे सोचण लगे थी, 'में आलूण पराँठा असे ईया केंआ अब्बुल नेइ'। रवि बी अपु

कम खत्म कियू त खुशी-खुशी जोड़ अपु नउइ जुएली पसंदे जलेबी त बंगे खरीद कइ गी ऐई गा। दुवा पुटा अन्तर जे ऐण पेंत अपु जुएली जे बोलु, 'अउं ऐई गा'। हथ-मुह धोइ कइ अपु जुएली कलाइ की। सुनीता तसे हथ केंआ छुट्टक कइ अपु कम करण लग गई। रवि पुछू, 'की भू? प्रिसिपल किछ बोलु ना? होर केनी कि बोलु ना?' सुनीता लहेरी कइ बोलु, 'में आलूण पराँठा तें ईया केंआ अब्बुल नेइ'। रवि हैरान भोइ गा, से कि बोलुण लगो असी तेस पता नेई लगो। हैरान भोइ कइ तेन अपु जुएली केंआ पुछू, 'की.....आलूण पराँठा?'

तुस खुद सोचे, इदिया पता तन्के बुच कि भोइ सकतू। इ कथा समझांती कि मइदे त जिल्हाणु सोच की अलग-अलग असी।
Cont.....

चलाक गौड़ा


यक बोडा जंगल थिआ। तेस जंगल अन्तर सुआ जंगली जनवार थिए। तन्हि अन्तर यक गौड़ा बी थिआ, तेस नउ भोली थियू। तेस जंगल अन्तर यक बबर शेर बी थिआ। यक रोज शेर शिकारी पिंजरे अन्तर फंसो थिआ। भोली गौड़ा घास चरती-चरती पिंजरे भेइ पुज गई। बबर शेर भोली काइ छड़ी त तेस जे हक देण लगा। बबर शेर भोली जे बोलु, 'भेणिये! तु मोउं पिंजरे केआं बहरी किद। भोली बोलु, 'मोउं नउ भोली जरूर असु, पर अउं अति बी भोली नेइ। अउं तें पिंजरा खोलु त तु मोउंऐ खाइ छता। ना...ना...अउं शाकाहारी भोजन कता'। अउं तउ ना खांता। तें छने में पिंजरा खोली दें। इ शुण कइ भोली बबर शेर पिंजरा खोल छइ। पिंजरा खोलते त बबर शेर भोली टइ छड़ी। भोली बोलुण लगी, 'कि तेइ त अभेई बोलो थियू कि तु शाकाहारी असा'। शेर बोलु, 'अ से त असा। मेइं शुणु कि अस जे खांते, तसे बेलि हें शरीर बणता। तु घास-घुस खांती। त तें शरीर बी घासेरी बणो असा। घास त शाकाहारी असु। तउं त अउं तउ खांता'। बोते-बोते शेर मुंहे बइ पुओणी ऐइ गऊ। भोली बबर शेर चलाकी समझ गई। भोली बोलुण लगी, 'अगर तु मोउं खांता, शेर भाई, त तु बी गौड़ा बण घेन्ता, किस कि अस जे बी खांते, तसेरी बेलि हें शरीर बणता। अब तु सोचीं दे। गौड़ा बण गा त दुध बी देण ऐन्तू। 'बबर शेर बोलु, 'ना...ना। अउं शेर ठीक असा। पिंजरा खोलणे धन्यवाद'। इ बोलु कइ शेर तठिया नश गा। शेर नशता हेर कइ भोली जोरी-जोरी हंसण लगी।

कुछ खास खबर

- ◆ मौसम खराब भुणे बझाई जोइ हें पांगेई लाण-बाण बी सुसर शुरु नेई भो। जिमदार सोब परीशान भोइ गओ असे।
- ◆ जवाहर नवोदय स्कूले बाड़ी के पेपर 11 अप्रैल असे।

दुइ दोस्त बोक करण लगो असे.....

तें कदि मुखी जोइ पाला पड़ो असा न?



कोशिश त सुआ की पर आज तउ केआं न बच सका।

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

एडस बीमारी इन्सान जोइ यक लिंगि सम्बन्ध बणाणे बोलि कसे बी एडस एइ घेन्ता।... काँडोम सिर्फ 18% सुरक्षा कता।... एडस मेहणु के जिसम अन्तर कम से कम 7 केआ 10 साल तक कोइ लक्षण नजर न ऐन्ते.....ऐणे बाड़ी तुबारि अन्तर ।